



Број/Број: 01,02,03,03/11-05-212/10  
Сарајево/Sarajevo, 26.07.2010. године

## IZVJEŠTAJ SA MEĐUNARODNE PARLAMENTARNE KONFERENCIJE O KLIMATSKIM PROMJENAMA, LONDON 12.-16.07.2010. GODINE

U Londonu je od 12-16.07.2010. godine, u organizaciji Asocijacije Parlamenata zemalja Komonvelta Velike Britanije ( CPA UK), održana Međunarodna parlamentarna konferencija pod nazivom: Od globalnog ka lokalnom: Klimatske promjene nakon Kopenhagena.

Uz učešće predstavnika Parlamenata iz više od četrdeset zemalja Evrope, Afrike, Azije, Kanade i Australije raspravljano je o mogućnosti aktivnijeg djelovanja parlamentaraca na klimatske promjene u cilju zaštite ljudi i dobara od posljedica katastrofa izazvanih evidentnim promjenama u cijelom svijetu.

U ime Parlamentarne skupštine Bosne i Hercegovine ovom je skupu prisustvovala gđica Lejla Klokić, poslanik u predstavničkom domu PS BiH, na poziv CPA UK.

Prilikom oficijelnog otvaranja Konferencije, u uvodnom je izlaganju istaknuto da ovaj skup ima za cilj razmjenu iskustava i stavova, te da se parlamentarci upoznaju sa sredstvima zaštite životne sredine, što bi im trebalo biti od velike pomoći u suočavanju sa problemom na lokalnom, državnom i globalnim nivoima.

**Skupu se obratio g. John Bercow**, predsjednik Predstavničkog doma Parlamenta Velike Britanije, ističući da je, između ostalog i namjera organizatora ove Konferencije podržati članove parlamenata da utiču na stvaranje i provođenje politike o klimatskim promjenama na lokalnim, državnim i međunarodnim nivoima. S tim u vezi posebno je naglasio da su klimatske promjene globalni izazov na koji se može efikasnije djelovati uz stalne i usklađene napore.

Učesnici Konferencije u Londonu su imali priliku učestovati u veoma interesantnim i poučnim dijalozima i diskusijama sa članovima Parlamenta Velike Britanije i najeminentnijim stručnjacima za zaštitu životne sredine o tome koji su načini najbolji za suzbijanje klimatskih promjena putem zakonodavstva, odnosno kako se putem parlamentarnih aktivnosti i jačim pritiskom predstavnika zakonodavne vlasti u svim zemljama mogu ublažiti sve evidentnije klimatske promjene.

Učesnicima Konferencije obratili su se: Predsjednik Kraljevskog društva Lord Rees iz Ludlow-a, g. Gregory Barker, državni ministar za klimatske promjene u Vladi Velike Britanije, g. Nigel Evans, zamjenik predsjednika Parlamenta Velike Britanije, Dr. William F. Shije, generalni sekretar i sekretar CPA UK, veliki broj parlamentaraca te eminentna imena iz svjetskih finansijskih institucija, poput Svjetske banke, Ministarstva odbrane, svjetske trgovinske organizacije, prestižnih univerziteta, stručnjaci iz oblasti prava, tehnologije, zdravstva, religijskih zajednica, ali i predstavnici vodećih svjetskih medija.

**Moto Konferencije bio je kako zaštititi svjetsku populaciju od posljedica nadolazeće katastrofe izazvane klimatskim poremećajima nastale velikom emisijom ugljen dioksida koja već u svijetu odnosi žrtve**, posebno među najslabijom populacijom. Ovu činjenicu potkrijepili su mnogi govornici iz Afrike, Australije, Indije, Namibije, Bangladeša, ističući evidentne primjere rezultata globalnog zagrijavanja, gubitka ukupne površine zemlje kao npr. u Bangladešu 20%, zbog podizanja nivoa mora, velikih požara koji u posljednje vrijeme haraju Australijom, pesimističnom perspektivom mnogih ostrvskih zemalja poput Mauricijusa, Maldiva, Tuvalu-a, Kiribati-a.

U okviru Konferencije o klimatskim promjenama, organizator je upriličio posjetu lokalnim eko - projektima koji, na izvjestan način, svjedoče kako se mogu ublažiti klimatske promjene. BiH delegacija je imala priliku obići branu na Temzi, koja na poseban način štiti grad London od eventualnih većih prodora vode iz Sjevernog mora.

Na kraju rada Konferencije, učesnici su usvojili Zajedničku izjavu Treće CPA međunarodne parlamentarne konferencije o klimatskim promjenama, pod nazivom: Od globalnog do lokalnog: Klimatske promjene nakon Kopenhaga.

Izvještaj sačinila:

**Mirsada Bukarić-Kovačević**

Izvještaj odobrila:

**Lejla Klokić**

Prilog: Zajednička izjava međunarodne parlamentarne konferencije o klimatskim promjenama: Od globalnog ka lokalnom: Klimatske promjene nakon Kopenhaga.

Dostavljeno:

- **Kolegiju Predstavničkog doma PS BiH**
- **Kolegiju Doma naroda PS BiH**
- **Komisiji za vanjske poslove PD PS BiH**
- **Komisiji za vanjsku, trgovinsku politiku, carine, saobraćaj i komunikacije**
- **Kolegiju Sekretarijata PS BiH**
- **Ministarstvu vanjskih poslova BiH**
- **a/a**